



Guru ditipu, wang dalam akaun lesap

JOHOR BAHRU: Seorang guru berputih mata dan hanya ditinggalkan RM140 dalam akaunnya oleh 'pegawai penyiasat'.

Lebih malang, mangsa berusia 51 tahun itu terpaksa membuat pinjaman sebanyak RM250,000 bagi membayar wang jaminan setelah diperdayakan terlibat dalam pengubahan wang haram dan dadah.

Ketua Polis Daerah Kulai, Superintenden Tok Beng Yeow berkata, mangsa menyedari dirinya menjadi mangsa penipuan ketika menghubungi bank untuk menyemak baki wang dalam akaunnya, kelmarin.

Beliau berkata, Bahagian Siasatan Jenayah Komersial Ibu pejabat Polis Daerah (IPD) Kulai menerima laporan mangsa pada 11.27 pagi mendakwa telah ditipu oleh pemanggil yang menyamar sebagai pegawai insurans mendakwa pengadu ada membuat tuntutan perubatan sejumlah RM68,800, Februari lalu.

Namun, pengadu telah menafikan perkara tersebut dan ingin membuat laporan polis bahawa maklumat diri telah salah digunakan oleh individu yang tidak bertanggungjawab.

"Semasa panggilan tersebut, pengadu disambungkan kepada Ibu pejabat Polis dan bercakap dengan penolong pegawai penyiasat untuk membuat laporan polis.

"Pengadu kemudian disambungkan panggilan kepada pegawai penyiasat dan pegawai tersebut mengatakan pengadu mempunyai kes berkaitan pengubahan wang haram dan dadah serta perlu membuat rayuan kepada pendakwa raya," katanya dalam kenyataan, di sini.

Beng Yeow menasihatkan orang ramai berhati-hati dengan panggilan dan mesej palsu daripada mereka yang mendakwa sebagai pegawai bank, pegawai insurans atau agensi penguatkuasaan.

Jika orang ramai mempunyai maklumat berkaitan jenayah boleh menghubungi IPD Kulai menerusi talian 07-6632222.